

Capu II - Formas assotziativas e de collaboratzioni

Art. 53 - Aziendas specialis

1. Su Consillu Comunali podit deliberai sa costituzioni de aziendas specialis, ca tenint personalidadi giuridica e de autonomia gestionali e imprenditoriali, e ndi aprovat su Statutu.
2. Is aziendas specialis faint sa faina insoru sighendu critèrius de trasparèntzia, de eficàcia, de eficèntzia e de economicidadi e tenint s'òbligu de su parègiu finantziàriu e econòmicu de sighiri po mèdiu de s'ecuilibriu de is spensas e de is ricavus, e puru is trasferimentus.
3. Is servìtzius de cumpetèntzia de is aziendas specialis podint èssiri fatus puru foras de su territòriu comunali, fata prima una stipulatzioni de acordus po garantèssiri s'economicidadi e sa calidadi prus bella de is servìtzius.

Art. 54 - Strutura de is aziendas specialis

1. Su Statutu de is aziendas specialis nd'arregulat sa strutura, su funtzionamentu, is atividadis e is controllus.
2. Funt òrganus de is aziendas specialis su Consillu de amministrazzioni, su presidenti, su Diretori e su collègiu de revisioni.
3. Su presidenti e is amministradoris de is aziendas specialis funt nominaus de su Sìndigu intra is personas chi tenint is recuisius de elegibidadadi a consilleri comunali chi tenint cumpetèntzia tècnica o amministrativa speciali po stùdius fatus, po fainas fatas in aziendas pùblicas o privadas o po ufìtzius tentus.
4. Su Diretori est pigau po mèdiu de cuncursu pùblicu, bogadas is ocasionis previdias de su T.U. 2578/25 candu si podit fai una tzerriada diretta.
5. Su Consillu Comunali providit a sa nòmina de su collègiu de is revisoris de is contus, donat su capitali de dotatzioni e detèrminat is indiritzus e is finalidadis de s'amministrazzioni de is aziendas, e puru is critèrius generalis po sa determinatzioni de is tarifas po gosai de is benis e de is servìtzius.
6. Su Consillu Comunali aprovat puru is bilàncius annualis e pluriennalis, is programmas e su contu consuntivu de is aziendas specialis e fait sa vigilàntzia apitzus de su traballu insoru.
7. Is amministradoris de is aziendas specialis podint èssiri revocaus sceti po violatzionis gravis de lei, po ineficièntzia o diformidadi documentada de is indiritzus e de is finalidadis de s'amministrazzioni aprovadas de su Consillu Comunali.